

藏經書院版

卐
續藏經

第 18 冊

中國撰述

大小乘釋經部

新文豐出版公司發行

中華民國八十二年三月一版三刷

新編 出續藏經 全一五一册
第一八册

精裝一册基價一五·五五元正

編輯者 藏經書院

版權 發行人 高 本 釗

發行及 新文豐出版 股份 有限 公司



所有

公司：臺北市雙園街九十六號
電話：三〇六〇七五七·三〇八八六二四
門市部：臺北市羅斯福路一段二十號八樓
電話：三四一五二九三·三四一五二九四
台北郵政三六四三信箱
登記證：局版臺業字第〇六四九號
郵政劃撥：〇一〇〇四四二六號
傳真：三九二八五一六·三〇二三八七〇

南無本師釋迦牟尼佛



卍續藏經 第十八冊目錄

新文豐出版公司影印卍續藏經會編印

中國撰述 大小乘釋經部

楞嚴經合論十卷·····	宋德洪造論	0001
楞嚴經正脉疏科一卷·····	宋正受會合	0001
楞嚴經正脉疏懸示一卷·····	明眞鑑作	0191
楞嚴經正脉疏十卷·····	明眞鑑述	0257
楞嚴經正脉疏十卷·····	明眞鑑述	0310

大佛頂首楞嚴經合論序

首楞嚴經之垂於世也蓋指如來之藏性與衆生之本源了無差別但能窮盡妄心自然發露眞見故慶喜自無迷悟中而立聞善逝於無言說中而對酬玉轉珠回聖言彌布絲是有七徵八還四緣塵二顛倒之密示五陰六入十二處十八界二十五圓通之詳辯七趣三增進四明誨諸位洎五十種魔之顯決其旨洞達若大明麗天而昧者不覩是以宏識之士爲之箋爲之疏靡不渙釋然至其堂奧則紅紫亂朱反晦於聖意者多矣故寂音之論作豈得已哉觀其以智照三昧區分派別振發大義於詆闢之間無施不可雖生遠筆削復何以加或謂論非見諦菩薩莫能爲之是安知寂音果非見諦者耶愚嘗取其文列於經右猶昔人以李長者之論合諸華嚴間有闕遺不愧狂斐輒事補緝并抒其大略冠于帙首庶幾栖神斯文者了然無惑直證眞常餘則具具于本序云
時嘉泰癸亥上元日沙門正受謹書

大佛頂如來密因修證了義諸菩薩萬行首楞嚴經論序

會萬物之謂心冥一心之謂道心也者虛融包博煥發遼凝應變無方威神莫測恢遠微妙無得而思議焉良以溷生大海雲點太清鼓識浪而渺瀰洋情塵而紆鬱由是正偏知者利見五天洞開實際之門廣示眞修之路使識眞者造忘言之極懷寶者免窮丐之勤前聖後聖莫不由斯而悟入矣首楞嚴經者開如來藏之要樞指妙明心之徑路了根塵之妙訣照情妄之玄猷眞所謂人一乘之坦途關異見之宏略始自阿難循乞遭幻術所加文殊承言宣神呪以護於是殷勤請最初方便大慈示本覺元常唯一直心無委曲相以斯內外七處破妄心而顯眞心明暗八還破妄見而顯眞見空五陰之處界廓七大之性圓各各知心徧十方如觀掌果一一悟性滿巨海不認浮漚獲本妙心不從他得加以滿慈疑山河大地無狀忽生慶喜請華屋天王必由門入那知翳目妄起狂華分彼湛圓成茲渾濁體六一之無二究結解以

同源然則解雖密圓行由人顯遂乃教諸無學各說
圓通無非真實法門咸是本來因地文殊大智擇法
眼以無差觀音大悲被娑婆之根器微塵諸佛同契
眞常解行證成於焉罄矣厥後開物成務請益陳疑
禁戒防非垂四種明誨清淨修證列十地階差放光
宣神呪之功顛倒成類生之異精研七趣廣示六交
重回紫磨金山爲說禪那現境五種妄想爲其本一
切魔事因之興乘悟併銷由次第盡眞無上寶印誠
微妙蓮華窮徹果因備殫理事祛十惡之重障喻七
寶以難齊開示未來菩提可到一經旨趣略舉於斯
微細粗明宗趣將釋此經先明宗趣諸師疏說小異
大同今之所明總如來藏性聖凡平等爲宗首楞嚴
定離念進修爲趣又以首楞嚴定破諸妄見永絕輪
迴爲宗顯本妙覺明如來藏性爲趣若依賢首大師
五教門類諸師所議正唯終實之教兼於頓圓若以
此經功能不出破顯二字破則破諸妄見顯則顯一
眞心雖有多途不過此意然般若一部皆唯遣相圓
覺二章頓顯本心此經先云皆由不知常住眞心次

第約心目二塵委曲精微歷三科七大之法因緣和
合虛妄有生因緣別離虛妄名滅殊不知生滅去來
本如來藏妙眞如性性眞常中求其去來迷悟生死
了不可得廣有其文不欲備引或曰諸師造疏已廣
通明何藉方今更爲論義答曰如來慧辯理義聯環
房公淵文詞采簡潔而守章句者滯筌蹄之學求理
本者陋文字之繁未能和會折衷雅符上器不揆蠢
管擬測高深細正綱宗粗分科段比前註疏誠有所
遺翦稗莠而顯出嘉苗忘義象而專趨妙悟與我同
志諒無訛焉

大佛頂如來密因修證了義諸菩薩萬行首楞嚴經
合論卷第一

一名中印度那爛陀大道場經於灌部錄出別行

天竺沙門般刺密諦譯

烏菟國沙門彌伽釋迦譯語

正議大夫同中書門下平章事房融筆
受

筠溪沙門德洪造論

東吳沙門正受釐論入經并刪補

稽首智無礙 對現妙色身 無陋金剛句

出情無比法 靜專福德藏 怖魔和合衆

種種悲願光 密相加被我 盡微細惑習

滅見慢倒想 得無礙辯才 入遊戲三昧

解釋稱性義 除疑照邪暗 以徧施含識

令佛種不斷

論曰成佛顯決唯了知自心入道要門但隨順心
體何謂隨順曰稱性觀照也何謂了知曰超情悟
明也所以悟明不礙精嚴觀照謂之方便故古之

聖師宏經必立宗趣也此經尊頂法故以明見佛
性爲宗示大定故以滅塵合覺爲趣明見佛性者
以其離一切見故六十二喻頂法爲第一佛不自
見離自見相故肉髻覆之離他見相故自他所不
能見之謂密蓋無量義趣三昧自住三摩之地深
固幽遠無人能到者也如易曰退藏於密密如蓮
之密說文曰蓮可用可見者本而已獨退藏於無
所用者其密也如來因此以成道故曰密因修證
了義也問曰既曰了知自心便爲顯決又曰修證
何也曰圓覺曰一切衆生於無生中妄見生滅是
故說名輪轉生死如來因地修圓覺者知是空華
卽無輪轉則如來以了知爲修明矣又曰一切衆
生皆證圓覺逢善知識依彼所作因地法行爾時
修習便有頓漸則如來又以修爲方便也非顯決
乎經言諸法所生唯心所現一切因果世界微塵
因心成體則知衆生自心力用至大特以諸塵染
汙故昏劣耳要當以止觀定慧方便淨治之使合
本妙何以知之龍勝曰佛說心力爲大行般若波

羅蜜故散此大地以爲微塵以地有色香味觸重故自無所作水少香味故動作勝地火少香味故熱勝於水風少色香味故動作勝火心無四事故所爲力大又以心多煩惱結使繫縛故令心力微少有漏善心雖無煩惱以心取諸法相故其力亦少二乘無漏心雖不取相以智慧有量及出無漏道時六情隨俗分別取諸法相故不盡心力諸佛及大菩薩智慧無量無邊常處禪定於世間涅槃無所分別諸法實相其實不異但智慧有優劣行般若波羅蜜者畢竟清淨無所罣礙一念中能散十方一切如恒河沙等三千大千國土大地諸山爲微塵故知真心有此大力衆生妄隔而不覺知耳知而能以止觀照之非要門乎首楞嚴此云健相涅槃經曰首楞者名一切畢竟嚴者名堅堅卽健相不可變壞故一切畢竟者生滅滅盡故如易以乾首衆卦曰大哉乾乎剛健中正純粹精也象曰天行健君子以自強不息精嚴之謂也夫菩薩萬行增於六度六度生於定慧定慧成於止觀止

觀體於首楞嚴故經言首楞嚴王具足萬行者謂是故也菩薩學之以滿足菩提故曰諸菩薩萬行首楞嚴經者說文曰織有經集絲爲之經常而緯變夫經之所爲經而已緯以成之則經所不能言也故孔子貴神而明之存乎其人

如是我聞一時佛在室羅筏城祇桓精舍

論曰室羅筏城此云舍衛具云室利羅伐悉底祇桓此云逝多具云祇陀桓今略之也龍勝曰如來臨入涅槃時告阿難十二部經汝當流通又告優波離一切戒律汝當受持告阿那律汝得天眼常守護舍利勸人供養告大衆言我若住世一劫會亦當滅語已雙林北首而臥入般涅槃阿難親屬愛習未除心沒憂海阿泥盧豆語阿難曰汝是守護佛法藏者不應如凡夫人自沒憂海諸有爲法並是無常汝何愁憂又佛世尊手付汝法汝今愁悶失所受事世尊今日雖在明日卽無汝當問佛未來要事盧豆教問者四事一問如來在世親自說法人皆信受如來滅後一切經首當置何言二

問如來在世諸比丘等以佛爲師如來滅後以何爲師三問佛在世時諸比丘衆依佛而住如來滅後依誰而住四問如來在世惡性比丘佛自治之佛滅度後云何共住阿難如教請問世尊世尊答曰經首當置如是我聞一時六字等爲句二曰比丘皆以波羅提木叉爲師三曰諸比丘皆依四念處住四曰惡性比丘以梵檀治之如來旣入涅槃阿難於七葉巖中結集法藏身如諸佛具諸相好于時大衆起三種疑一疑世尊以大悲故復起說法二疑他方諸佛來此說法三疑阿難成佛爲衆說法阿難卽唱如是我聞一時三疑頓息

與大比丘衆千二百五十人俱皆是無漏大阿羅漢佛子住持善超諸有能於國土成就威儀從佛轉輪妙堪遺囑嚴淨毗尼弘範三界應身無量度脫衆生拔濟未來越諸塵累

論曰大比丘爲衆所知識者也常隨世尊有一千二百五十人世尊成道先度五俱輪又度舍利弗目犍連師徒二百人又三迦葉師徒一千人又度

耶闍或云長者五十人今舉其大數耳漏有三種謂無明漏欲漏有漏皆斷盡故阿羅漢此云應具三應也唐賢首承習儼公立五教一小乘教二大乘始教三終教四頓教五圓教初小乘爲情有持戒修福生天獲報故二始譚空破有而許定性二乘俱不成佛故三終盡大乘理法定性二乘無佛性者及闡提悉當成佛故四頓以一念不生卽名爲佛不從地位階升故五圓備普賢法界事事無礙帝網重重主伴具足故義學之師於五教中判此經爲大乘終教兼於圓頓謂有證有修同小乘故是大不然如圓覺澄鍊三觀洗滌四相取證於長期較功於半偈非有證有修乎而世尊親判曰是經名爲頓教大乘頓機衆生從此開悟何哉學者當推世尊之意知此經事項法故亦名頓教也問曰圓覺之敘衆德則文殊普賢金剛藏地上諸大菩薩而此經之敘衆德則止曰善超諸有成就威儀嚴淨毗尼越諸塵累者其所以異安在曰經各依所緣此以阿難爲緣起故也世尊於金剛般

若曰爲大乘爲最上乘者說及觀其詞旨曰持戒修福者於此章句能生信心持戒修福非成就威儀嚴淨毗尼手依義學之師則達世尊明告之意也余嘗深觀此經得世尊之意知其簡要精妙深切著明世尊愍衆生流轉三界皆由著欲於諸欲中唯姪爲重故經首敘摩登伽女特言其故謂溺之爲大患絕之爲大利譬如牧羊鞭其後者故於機會處必痛致其意寶蓮香比丘尼持菩薩戒私行姪欲妄言行姪非殺非偷無有業報卽於女根生大猛火然後節節猛火燒然墮無間獄而烏芻瑟摩以聞佛說多姪之人成猛火聚以火光三昧成阿羅漢曰諸漏旣消生大寶燄登無上覺夫無上覺佛地也而觀姪性則便能登之無間獄惡道也而從姪事則能生陷之又論十種習因則首敘姪習曰一者姪習交接發於相磨研磨不休如是故有大猛火光於中發動是故十方如來色目行姪同名欲火然後乃敘貪慢等又毗奈耶宣說修行三決定義所謂攝心爲戒因戒生定因定發慧

是則名爲三無漏學令斷殺盜姪妄而此經敘姪於先又觀世音菩薩自敘三十二應身說法而梵天王以欲心明悟便與佛菩薩緣覺聲聞同名解脫自餘二十八種應身止名成就而已又以五種辛熟食發姪生啖增恚令修行人立三漸次以斷之名爲第一增進又觀姪欲過猶毒蛇禁戒成就父母肉眼能觀十方又他經皆云七地方證無生法忍是皆機會處痛致其意者也

其名曰大智舍利弗摩訶目犍連摩訶拘絺羅富樓那彌多羅尼子須菩提優波尼沙陀等而爲上首復有無量辟支無學并其初心同來佛所屬諸比丘休夏自恣十方菩薩咨決心疑欽奉慈嚴將求密義卽時如來敷座宴安爲諸會中宣示深奧法筵清衆得未曾有迦陵伽音徧十方界恒沙菩薩來聚道場文殊師利而爲上首

論曰舍利弗具云奢利弗怛羅此云驚子亦云身子摩訶目犍連正云摩訶沒特伽羅此云大采菽氏摩訶拘絺羅此云大膝富樓那彌多羅尼子此

云滿慈須菩提此云空生優波尼沙陀此云近少
 又云塵性辟支具云辟支迦羅此云緣覺又云獨
 覺迦陵是僊禽也此禽在穀穀而鳴其音已歷衆
 鳥佛說法音如之文殊師利此云妙吉祥又云妙
 德根本智也雜華論曰文殊師利菩薩在東震旦
 國清涼山中與萬菩薩止住清涼山震旦國東北
 方艮位也夫心法至妙卽事卽理無假法也舉必
 皆眞棗栢妙得其旨乎余觀此經敘標文殊師利
 凡五處皆非苟然各表其法艮位東北而菩薩居
 之爲根本智艮止也恒沙菩薩來聚道場文殊師
 利而爲上首者以頂法難信之法也艮爲少男有
 發蒙起信之義將呪往護惡呪銷滅提獎阿難歸
 來佛所者溺於姪海失於依救艮爲手有撫憐援
 接之義此諸大衆不悟如來發明二種精見色空
 是非是義者請佛決之以息馳求艮爲止有息滅
 散亂之義今欲令阿難開悟二十五行誰當其根
 而文殊師利承佛威神說偈對佛者證悟易難以
 智擇之艮爲指有料理揀擇之義卽從座起頂禮

佛足而白佛言當何名此經者一會之法始終皆
 歸本智艮爲萬物之所終始故曰成言乎艮非特
 然也雜華以善財於福城之東首見文殊師利乃
 南詢知識者五十三人入彌勒大莊嚴樓閣已彌
 勒却令復見初友文殊者與此意同也嗚呼三世
 諸佛十方菩薩所示指法開悟衆生不肯正言而
 密以其意寓事法之中何也曰非不欲正言也以
 其有不勝言者耳孟子長於譬喻而易象之所示
 易曰君子以教思無窮學如伯夷隘柳下惠不恭
 則窮矣涅槃經欲示有生必有死二法不相離則
 設功德天黑暗女姊妹不能相捨離之詞法華經
 欲示卽滅卽生之體則設七寶塔中多寶滅佛釋
 迦生佛共座而坐此皆寓於事法之意也
 時波斯匿王爲其父王諱日營齋請佛宮掖自迎如
 來廣設珍羞無上妙味兼復親延諸大菩薩城中復
 有長者居士同時飯僧佇佛來應佛敕文殊分領菩
 薩及阿羅漢應諸齋主唯有阿難先受別請遠遊未
 還不遑僧次既無上座及阿闍黎途中獨歸其日無

供卽時阿難執持應器於所遊城次第循乞心中初求最後檀越以爲齋主無問淨穢刹利尊姓及旃陀羅方行等慈不擇微賤發意圓成一切衆生無量功德阿難已知如來世尊訶須菩提及大迦葉爲阿羅漢心不均平欽仰如來開闢無遮度諸疑謗經彼城隍徐步郭門嚴整威儀肅恭齋法

論曰波斯匿王訛略也應云鉢囉斯那逝多此云勝軍又云和悅西竺以四種姓爲淨於中又分尊賤刹利淨姓旃陀羅穢姓阿難具云阿難陀此云慶喜應器具云應量器檀越此云施主如律所制應比丘遠出須三人俱爲上座阿闍黎如乞食之法比丘應次第乞阿難既無上座行乞又無次第故迦葉舍爲邪呪所持耳世尊食時行乞有五種義一由內證平等理外不見貧富相故二離貪慢心偏利故三有大定力不懼惡象姪女家故四離凡夫猜嫌故五破二乘分別故是謂開闢無遮度諸疑謗也世尊與比丘應供行乞必於辰巳之間而名曰齋何謂也與衆生接之時也夫與衆生接

其可不齋乎易曰齋戒以神明其德又以佛性故等視衆生而以交神之道見之間曰寶積經云如來至真以法爲食所以者何如來之身成鈎鎖體猶如金剛鏗然堅強不可破壞其如來無有生臟亦無熟臟復無堅軟亦無不淨大小諸便之穢云何應供曰諸佛證衆生之體用衆生之用用衆生之用則遇緣卽宗故世尊以沙門之相現沙門日用沙門者著壞色衣執持應器以乞自活世尊欲外是手 補曰須菩提與大迦葉嘗持鉢詣檀門循乞大迦葉則捨富而從貧須菩提則捨貧而從富其心未能等慈皆爲淨名所訶而此經乃曰如來不言淨名者蓋是如來亦嘗訶之爾無盡海眼便謂非如來之訶輒刪去十有三字且如來叱小無機不備決不應取此而略彼況一代時教流傳此土萬無一二安知他經不載此呵烏可但執一偏專歸於淨名哉方諸師結集繙譯此正敘起教之由亦不應遍有引援之誤所言別請者因於他事非謂齋也故下文曰其日無供

爾時阿難因乞食次經歷姪室遭大幻術摩登伽女以娑毗迦羅先梵天呪攝入姪席姪躬撫摩將毀戒體

論曰摩登伽是女之母名也此云本性娑毗迦羅

此云黃頭僂撫摩觸也僧殘罪八萬行中只毀一戒者此也於二十大僧中可憐卽得清淨脫犯根本罪則不可憐如針鼻缺如石析不可再合然戒以無表思爲體其可毀哉持犯但束身而已方便語也但親近般若者於女人特當謹嚴寶積女人三昧偈曰四大假爲女其中無所有凡夫迷惑心執取以爲實女人如幻化愚者不能了妄見女相故生於染著心譬如幻化女而實非女人無智者迷惑便生於欲想如是了知已一切女無相此相皆寂然是名女三昧要令此觀常不失壞又法華經安樂行品最初親近則曰不應於女人身取能生欲想相而爲說法亦不樂見若入他家不與小女處女寡女等共語又曰若爲女人說法不露齒笑不現臂臆乃至爲法猶不親厚況復餘事蓋障

道之法女人爲最漢李陵與虜戰陵曰吾士氣少衰而鼓不起者何也軍中豈有女子乎搜於匿車下果得之卽斬焉明日復戰斬首三千餘級嗚呼彼但畜之已毀王師必勝之氣與之從事則安能登諸佛無上之道乎補曰議者曰詳夫將毀二字是登伽將毀阿難之戒體非阿難自將毀其戒體也世師不能辯此乃準律同凡結罪恐以通經之功未補毀聖之過學者多至此而猶豫且阿難位在初果已斷見惑豈有毀犯爲益羣機故以大權起教明矣然亦登伽入道機熟之時也使其不然則文殊將呪往護何得提獎阿難并摩登伽歸如來所乎又登伽至佛座下未久何能卽證阿那含果耶按摩登伽女經云阿難昔五百世時與摩登伽爲夫婦愛習未忘故有斯事寂音當以是而論之要亦無害然根本罪作大乘無生理觀亦可以懺所謂法性既空則罪福無主普賢偈曰若欲懺悔者端坐念實徧衆罪如霜露慧日能消除如來知彼姪術所加齋畢旋歸王及大臣長者居士

俱來隨佛願聞法要于時世尊頂放百寶無畏光明
光中出生千葉寶蓮有佛化身結跏趺座宣說神呪
論曰此經凡五次放光非苟然也初自頂放光表
尊法故又自面門放光表所說非疑暗法故又自
臂已字放光表示此心體故又自十方普佛世界
微塵如來所放光表佛佛同證此頂法故又自五
體放光表依他偏計盡全是精進功德之聚諸根
互用成大智慧海故佛與衆生體本平等癡愛所
纏故不自敬重乃於他起見慢見慢起已必欲凌
之便生倒想倒想成矣卽與境敵失平等法散爲
異類龍勝曰姪欲情重無明偏多受驚鴨孔雀鴛
鴦鳩鵲鸚鵡鸚鵡百舌之屬受此衆生種類百千
姪欲罪故身生毛羽隔諸細滑嚙距塵腳不別觸
味蓋姪心煩燒名爲熱惱姪事穢濁名爲欲泥阿
難未明頂法癡愛所縛呪力乘之忽失正念遂起
見慢卽墮倒想怒于愛主怖畏散亂幾陷欲泥寶
有貴重義光有破暗義故曰百寶無畏光明蓮華
淨妙義見者清涼除熱惱雖生淤泥而不染故於

熱惱欲泥中見此頂法妙華清涼則所有現行俱
無能所心境雖敵皆如幻住故名爲佛故曰光中
出生千葉寶蓮有佛化身宣說也呪者不可思議
力之寄非智識可到理義可求如世以龜瓦卜以
無理故有靈如童子謠以無心故有驗小者猶然
況大者乎

敕文殊師利將呪往護惡呪銷滅提獎阿難及摩登
伽歸來佛所阿難見佛頂禮悲泣恨無始來一向多
聞未全道力殷勤啓請十方如來得成菩提妙奢摩
他三摩禪那最初方便

論曰奢摩他此云止三摩鉢提此云等至禪那此
云靜慮是三種名同一止法但淺深力用不同初
如止水垢濁自澄淨光發現名爲寂靜定次則離
沈掉生勝定故一切神通變化之所成就名爲資
發變化定又其次則慮而靜當生而不生名爲寂
滅定而妙奢摩他三摩禪那者以此三種止法之
中首具觀照故曰最初方便天台曰息惑要門無
先曰止圓覺曰此三法門皆是圓覺親近隨順如

易觀卦巽下順巽者所以親近之順者所以隨順之視其六爻於三四五爲艮止也觀中亦有止不止何以觀外止中亦有觀不觀何以能止哉

於時復有恒沙菩薩及諸十方大阿羅漢辟支佛等俱願樂聞退坐默然承受聖旨

佛告阿難汝我同氣情均天倫當初發心於我法中見何勝相頓捨世間深重恩愛阿難白佛我見如來三十二相勝妙殊絕形體映徹猶如琉璃常自思惟此相非是欲愛所生何以故欲氣麤濁腥臊交遘膿血雜亂不能發生勝淨妙明紫金光聚是以渴仰從佛剃落佛言善哉阿難汝等當知一切衆生從無始來生死相續皆由不知常住真心性淨明體用諸妄想此想不真故有輪轉

論曰阿難自陳出家因見佛相好世尊乃言相續生死由悉不知真心而用妄想視其詞則如使其觀流而討源味其意則實譏其背覺合塵也夫見聞覺知之根未拔則色聲香味之塵豈亡如翳與空華本不相待所以一部之經從見根而發起也

然圓覺經淨諸業障菩薩問曰若此覺心本性清淨因何染汙使諸衆生迷悶不入而世尊不言所因但曰無始世來妄想執有我人衆生與壽命而已此經亦止言生死相續皆由不知常住真心未嘗言所以不知也唯維華曰以不了第一義故號爲無明棗栢曰以眞智無性故不能自知無性故名無明倘能了知則無生死是以知世尊於此言不知真心相續生死爲要決也楞伽經曰前聖所知轉相傳授妄想無性夫無性卽無生是以知世尊於此言此想不真故有輪轉爲明誨也

汝今欲研無上菩提眞發明性應當直心訓我所問十方如來同一道故出離生死皆以直心心言直故如是乃至終始地位中間永無諸委曲相

論曰問於此特言眞發明性則亦有妄發明性乎曰有之曰何以辯之哉曰夫任運徧知本妙而常寂者眞發明性所謂十方如來同一道故出離生死皆以直心是也違時失候妄覺而強知者妄發明性所謂用諸妄想此想不真故有輪轉是也本

一體也以無性無時故隨所用之有異耳任運寂常而知則合本妙違時失候而覺則合妄塵馬鳴曰本性清淨無明不覺染心相現雖有染心性常明潔染心之相卽現行無明明潔之性卽不動智體有僧問雲菴雜華論稱現行無明卽是如來不動智此實難信如何得解時有童子方掃地雲菴呼之童子回首雲菴曰非不動智乎又問如何是汝佛性童子左右視罔然而去雲菴曰非現行無明乎眞發明性譬如明珠之光常自照珠孔子曰思無邪近之矣妄發明性譬如東方將旦澄滓之間已有精色易曰蒙雜而著近之矣

阿難我今問汝當汝發心緣於如來三十二相將何所見誰爲愛樂阿難白佛言世尊如是愛樂用我心目由目觀見如來勝相心生愛樂故我發心願捨生死佛告阿難如汝所說眞所愛樂因子心目若不識知心目所在則不能得降伏塵勞譬如國王爲賊所侵發兵討除是兵要當知賊所在使汝流轉心目爲咎吾今問汝唯心與目今何所在

阿難白佛言世尊一切世間十種異生同將識心居在身內縱觀如來青蓮華眼亦在佛面我今觀此浮根四塵祇在我面如是識心實居身內佛告阿難汝今現坐如來講堂觀祇陀林今何所在世尊此大重閣清淨講堂在給孤園今祇陀林實在堂外阿難汝今堂中先何所見世尊我在堂中先見如來次觀大衆如是外望方矚林園阿難汝矚林園因何有見世尊此大講堂戶牖開豁故我在堂得遠瞻見

論曰般若經言一切智智清淨開法空道也而一十六會至數千萬偈但舉色一法破之色有實尙爾虛僞況受想行識四者但名言乎此經以明見佛性示見聞覺知之性無生也而兩會數萬言但論見一法者半之適今所標者蓋其源也詞義奕奕連綴至緣見因明暗成無見不明自發則諸暗相永不能昏處譬如淘金者沙礦都盡而金自現矣猶存無見之見則不可何以故以非眞見故故曰見猶離見又當離聞故曰心精遺聞又當離覺